

Indoor Festival duei vegnir optimaus

Suenter ina pausa dad endisch onns ha giu liug a Mustér l'entschatta matg 2022 in'ulteriura ediziun digl Indoor Festival. La proxima vegn organisada primavera proxima e quella duei vegnir optimada, en emprema lingia per contonscher silmeins in quen ulivau.

HANS HUONDER/FMR

«Suenter igl Indoor Festival 2022 cun in deficit da rodund 10 000 francs havein nus stuiu far ponderaziuns co continuar. Consequentamein havein nus analisau tgei ch'ei buca stau bien», di il president dil comite d'organisaziun Florian Zanin. Aschia ein ils organisaturs sedecidi da consultar il publicum dil davos indoor: «Il settember havein nus lantschau ina retschera sin nos canals digital. En tut ein 177 persunas separticipadas a quella. Quei ei stau bia dapli che quei che nus havevan spitgau.» Pils organisaturs seigi ei stau fetg interessant d'evaluar las rispostas ed aschia da recaltgar enonuschientschas tgei che savess vegnir fatg meglier la proxima ga. Quella proxima ga ei ils 12 e 13 da matg 2023, danovamein el Center Fontauna a Mustér. Las participontas ed ils participonts dalla retschera han dil remiment saviu gudignar premis. Igl ei vegniu regalau quater entradas pil festival vegnent.

Bands pli actualas

Sin fundament dall'evaluaziun dallas rispostas survegnydas ha il comite d'organisaziun decidiu da s'engaschar en tschun differents puncts. Il festival duei denton en mintga cass esser ina liug da sentupada per giuven e vegl.



Impressiun digl Indoor Festival dalla primavera vargada el Center Fontauna a Mustér. FOTO MAD

- La «After-Show-Party» cun DJ duei succeder naven dalla tribuna principala cun illuminaziun.
- La halla da concert duei esser pli pintga, per aschia haver dapli atmosfera.
- Ils prezis dallas entradas duein vegnir reponderai.
- Dar dapli peisa alla persistenza, per exempel ella gastronomia.

Tenor Florian Zanin duein ulteriurs impuls vegnir discussiunai els differents resorts. Era en quels duei ei dar ina u l'otra adattaziun. La finamira dils organisaturs ei clara, era pil proxim festival: «Nus lein porscher in festival qualitativ. Nossas visitadras e nos vistaders duein esser cuntents ed ina fatscheta rienta cu ei bandunan la halla. Quei ei reussiu a nus uonn, mo nies viadi ei aunc buca a fin.»

Plidentar la giuventetgna

«Igl ei dau en egl a nus, che la giuventetgna ha muncau ils dus dis dil festival. Per saver daco lein nus contactar las unius da giuventetgna da Mustér, Tujetsch e Medel», di Florian Zanin. La finamira da quei contact seigi da presentar il festival alla giuventetgna. Ins vegli mussar tgei lavur che vegn prestada per organisar in tal eveniment. Co ins contacteschi ed engaschi bands e daco ch'ei seigi buca pusseivel da survegnir ina ni l'otra formaziun. «Sin fundament da quella informaziun savein nus declarar

daco che nus stuein haver in prezi d'entrada persuenter», puntuescha Florian Zanin. Plirs termins per quella sentupada ein fixai, a Sedrun han in'emprema scuntrada giu liug. Eventualmein duein las unius da giuventetgna en autras vischnauncas medemamein vegnir contactadas. Medemamein ein ils organisaturs en contact culla scola a Mustér: «Avon igl Indoor Festival 2022 havein nus astgau visitar la classa dil davos onn da scola a Mustér. Ensem culs scolasts havein nus organisau entgens dis da project davart igl Indoor Festival. Era leu havein nus tematisau la lavur ch'ei dat, il sponsoring, marketing ed engaschament da bands», di il cau dall'organisaziun. Ei seigi stau in'interessanta scuntrada, l'idea seigi d'arranschar ina tala era igl onn vegnent, forsa era en autras vischnauncas.

Optimau ils cuosts

Agl Indoor Festival 2022 han ils organisaturs dumbrau 400 entradas il venderdis e 500 la sonda. Quei diember ei denton buca staus sufficients per cuvriar ils cuosts. «Igl onn vegnent vegnan las expensas ad esser pli bassas. Aschia profitein nus d'investiziuns fatgas uonn, mo lu havein nus era reduciu ils cuosts per las bands», di Florian Zanin. La finamira seigi da haver silmeins 400 entradas pagadas per di.